

NARODNA KUHINJA | Humanost đaka Srednje škole za tekstil, kožu i dizajn

Humanost đaka Srednje škole za tekstil, kožu i dizajn: Volontirajući žele biti korisni članovi društva

Autor: N. HADŽIŠEHIĆ

Učenici Srednje škole za tekstil, kožu i dizajn već mjesec svakodnevno volontiraju u Narodnoj kuhinji Stari Grad. Njihova praksa završava se u srijedu, a organiziraju je već petu godinu.

Alma Ahmethodžić, profesorica i koordinator volonterskih aktivnosti, kaže da kroz debatnu i Civitas sekciju nastoji da učenicima, pored znanja o građanstvu, prenese i životna znanja o solidarnosti, humanosti i odgovornosti.



Ahmethodžić: Životna znanja

Radne navike

Edo Demirović, koji pohađa treći razred, ističe da u Narodnu kuhinju dolazi na posao sa zadovoljstvom te da mu ništa ne pada teško.

- Tetka Zilha, kao i svi ostali zaposlenici, lijepo nas ugoste. Ovo je jedan vid druženja, a i lijepo se osjećam kad pomognem onima kojima je pomoć najpotrebnija. Dajem sve od sebe da onoliko koliko je u mojoj mogućnosti, olakšam korisnicima – rekao je Demirović.

Dodaje da se kroz volontiranje, također, trudi da stekne određene radne navike i nauči raditi poslove koje do sada nije imao priliku obavljati.

Učenica Dželila Kuldija prvi put učestvuje u ovom projektu. Ona kaže da je već duže vrijeme željela da volontira, a u kuhinji se odlično snalazi i, također, voli pomagati drugima.

- Naučila sam da je humanost veoma bitna i da se dobra djela uvijek vraćaju na najbolji način. Rado ću se i u budućnosti odazvati ovakvim akcijama i projektima – kaže Kuldija.

Prijateljski odnos

Zilha Šeta, upraviteljica Narodne kuhinje, kazala je da joj mnogo znači pomoć ovih mladih ljudi.

- Učenici su veoma vrijedni i nijedan posao ne odbijaju. Stvorili smo prijateljski odnos. Oni mi se povjeravaju, a ja ih savjetujem. Ja ću, također, biti tu za njih i kad se projekt završi. Kao i prethodnih godina, odvojit ću jedan dio donacija da uplatim ekskurziju onima koji ne budu u mogućnosti sami sebi financirati – rekla je Šeta.



Šeta: Vrijedna omladina

I osnovci pomagali

Osim učenika Srednje škole za tekstil, kožu i dizajn, i druge škole su se pridružile volontiranju. Tako su u Narodnoj kuhinji radili i pomagali učenici Mašinske tehničke, Elektrotehničke, Medicinske škole... Pomoć nije izostala ni od najmlađih pa su đaci koji pohađaju osmi razred Osnovne škole "Safvet-beg Bašagić" pomagali u pripremi i podjeli obroka korisnicima.